

Date – 22/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma chuan Sawrkar tharah tunhma aia nasa leh hlawk zawka ruihhlo do an tum dawn a ti.**
- 2. Vety Dept Minister Pu C Lalsawivunga hovin tun hnaia ASF hrileng chungchanga hmalaknate sawiho a ni.**
- 3. Tukin dar 7 atang khan Lok Sabha inthlan thawhngana atan vote thlak a ni.**
- 4. Iran President Ebrahim Raisi leh sorkar mi pawimawhte chuanna helicopter chu nimin khan Iran hmarthlang lamah a chesual.**

<><><>

RUIHHLO DO CORE COMMITTEE

Chief Minister Pu Lalduhoma chuan Sawrkar tharah tunhma aia nasa leh hlawk zawka ruihhlo do an tum dawn a ti.

Ruihhlo do kawnga hmalak zel dan tur relin nimin khan CM Conference Hall ah Chief Minister ho hian Ruihhlo Do Core Committee te an thukhawm a. Ruihhlo dona atana ruahmanna tha leh tangkai tur ngaihtuah ani dawn a ti a, Sum leh pai mamawh tur a tul anga ngaihtuah zel a ni ang a ti.

Thutkhawmah hian Supply tihtlem kawnga hmalakna chu Excise & Narcotics lamin kengkawh se an ti a. Ruihhlo supply tihtlem tura sum leh pai mamawh te, a dona lama sawrkar puitu tlawmngaipawlte hnena thuneihna pek dan tur leh an hmanraw mamawh pek dan tur te an rel a. Ruihhlo ngai te enkawlina lam chu Social Welfare lamin kengkawh se an ti bawk. An hmalak mek te leh hmachhawp an neih te tarlangin, TNT Lunglei building sakna tur hmuh a nih thu te, de-addiction centre sakna tur Ministry of Tribal Affairs lama dap mek a nih dan te, district jail pasarih thuamthatna tura hmalak mek a nih thu leh ruihhlo ngai te enkawlina lama thawhpui tur foreign lam thlenga dap a nih dan te tarlan tarlan a ni bawk.

Thutkhawmah hian Home Minister Pu K. Sapdanga, Social Welfare Minister Pi Lalrinpuii leh Excise Minister Pu Lalnghinglova Hmar te pawhin an Department kaltlanga hma an lak dan tlangpui an tarlang a ni.

<><><>

HSSLC RESULT DECLARED

Mizoram Board of School Education chuan Higher Secondary School Leaving Certificate result nimin khan a ti chhuak a. Exam zawng zawng mi 11,824 zinga 9227 an pass a, pass percentage hi zaa 78.04 a ni a, niin nikum aiin 0.62 in a hniam.

Arts Stream ah Linden Lalremruatpuia, Oikos Hr Sec School chuan mark 500 ah mark 471 hmuin pakhatna a ni a. Commerce Stream ah David Lalhminghlua, St.Pauls Hr Sec School in mark 500 ah 460 hmuin Pakhatna a ni a, Science Stream ah Lalramdina Ralte, St Pauls Hr Sec School chu mark 500 ah 477 hmuin pakhatna a ni bawk.

Result tihchhuah anih velah hian MBSE Chairman Pu JH Zoremthanga chuan MBSE Conference Hall ah chanchinbu mite a kawm a. Result tluang taka a chhuah theih chhan chu Hr Sec School zirtirtute inpekna vang ani a, Education Department pumpui tanrualna vang ani tih a sawi.

Kumina HSSLC result chhuakah hian compartment 52 an awm a, heng naupangte hian admission an tlai lohna turin compartment exam hi buatsaih thuai an tum thu leh HSSLC result complaint hun chu result chhuah atanga ni 7 anih thu MBSE Chairman Pu JH Zoremthanga chuan a sawi bawk.

HSSLC result chhuakah hian exam beitu 11824 an awm a, Arts Stream ah 8467, Science Stream ah 2807 leh Commerce Stream ah 549 awmin pass zatah mipa aiin hmeichhia 679 in an tam zawk a ni.

HSSLC result chhuakah hian candidate zawng zawng pass vek sikul hi Arts ah 54, Science ah 2 leh Commerce ah 6 a awm a. Candidate zawng zawng fail vekna sikul hi Arts ah sikul 2, Science ah sikul 2 leh commerce ah sikul 1 a awm bawk.

Kumin atang hian NEP zulzuiin subject pakhatatah chauh exam tha duh tan a kum leh nghah ngai lovin Compartmental exam rualin an exam nghal thei tawh dawn a ni.

<><><>

AH&VETY MINISTER

Animal Husbandry & Veterinary Dept Minister Pu C Lalsawivunga Office Chamber ah AH & Vety Dept ten tun hnaia ASF hrileng chungchanga hmalaknate nimin khan an sawiho a.

He huna tarlan anih danin ASF hrileng vawi thumna nikum May - December chung khan vawk 1039 thiin, 928 suat a ni a. Kumin January atanga tun thla thleng khan Champhai, Aizawl, Saitual, Khawzawl, Lunglei leh Serchhip District ah te vawk 835 thi tawhin 1086 suat a ni a. Tun dinhmunah vawk damlo te enkawlina damdawi mumal a awm loh avangin Department chuan vawk vulhtute hriat tur leh zawm tur te an chhuah thin a. Local Council leh Village Council te hriatpuuin vawk thi leh suat tur chungchangah Department hotute nen in be pawp in hmalak thin a ni.

AH& Vety Dept chuan Vawk damlo leh thi te ASF an nih leh nih loh finfiah nghal turin Department Laboratory atanga confirmed mai theih a ni lo a ti a. ASF hi scheduled Disease zinga mi a nih avangin Central guideline angin confirm tur chuan NIHSAD, Bhopal emaw NERDDL, Guwahati a thawn tur a ni, Hemi avang hian Test result chungchangah hmalak zung zung theih a ni lova Mipuite hriatthiamna an ngen bawk a ni.

Ram dang atanga frozen vawksa lakluh chungchang pawh sawiho a ni a, tun dinhmunah state pawn atanga frozen vawksa Department hriatpuia lakluh a awm lo a, hei hi Vety dept in phalna a pek chhuah tawh loh vang a ni a, tuna lo lut hi dan lova lakluh a ni, tih meetingah hian tarlan a ni.

Minister chuan ASF vanga vawk vulhtu ten harsatna an tawh nasat zia hria in a tawrhpuia takzet thu a sawi. ASF hrileng dona kawngah mipui ten Department leh khawtlang hruaitute hmalakna tawiawm zel turin a ngen ani.

<><><>

SAITUAL

Saitual District huam chung Phullenah Police Beat Post siam thar chu IGP Pu Lalbiakthanga Khiangte chuan nimin khan a hawng.

Pu Lalbiakthanga Khiangte chuan Phullen Beat Post chu tangkai taka hman a nih theih nan, sualna chi hrang hrang manchhuah kawngah Police leh khawtlangin thawhhona tha tak an neih a ngaih thu te, Duty police te pawh hawihhawm taka khawtlang tana thawhpui nuam tak ni turin a fuih. Beat Post-a a lo chuang kai tawh chin chu mi mangang tanpui ngai annih tawh avangin Office dawrtu mipuite tha taka lo dawngsawng turin a chah bawk.

Saitual SP Pu Pukhraj Kamal Gupta chuan Phullen Beat post chu Saitual District a pian tirh a hawn sawi rik nghal anih thu a sawi a, tichuan hun kal zelah Kum 2023 April thla khan Pu J.Lalmuankima SP laia hawn phalna pek a nih thu a sawi a, Kum 2023 May thla atanga Saitual SP hna a zawm atangin a tul ang ang hma la zuiin Phullen VC te nen tangkawp in 25th Jan. 2024 khan Phullen Beat Post chu Saitual Police Station hnuiaia a nih dan tura kaltira nih theih nan order chhuah a nih thu leh Phullen Beat Post office atan Phullen VC te chuan NERLP building chu phal taka an hmantir thu a sawi bawk. SP chuan Beat Post mai ni lo Police station puitling a awm theih nan khawtlang hruaitute nen hmalak ho zel a pawimawh thu a sawi bawk.

Phullen Beat Post hnuiaiah thawktu ASI ho in police 7 an awm dawn a, case tenau investigation leh traffic dan bawhchhia thleng in an khawih theih dawn a ni.

<><><>

MAMIT

Mamit-ah Special District Consultative Committee (DCC), District Level Review Committee (DLRC), District Level Security Committee (DLSC) chu an Chairman, Pu V.L Remliana, District Bawrhsap hovin nimin khan an thukhawm a. Kum 2023-2024 March Quarter chungah Mamit District-a Bank hrang hrang hmalakna te thlirletna neih a ni.

Meeting-ah Social Security Schemes hrang hranga hmalakte thlirho niin March Quarter chhung hian PMJDY hnuaiiah mipa 13951 leh hmeichhia 18657, an vaiin 32608 ti thar an awm a. PMJJBY Enrollment ti thar 9234 leh PMSBY a in-register mi 15262 an awm. March Quarter chhung hian Financial Literacy Campaign vawi 37 neih a ni bawk.

Mamit District chhunga Bank hrang hrangte March Quarter-a an Credit Deposit Ratio hi zaa 74.11% niin December quarter-ah khan 78.94 a ni thung.

Meeting-ah hian District Credit Plan (DCP) thlirho ni bawkin Agriculture hnuaiiah zaa 52.83, MSE – zaa 65.72, Services – zaa 57.85 leh Crop Loan – zaa 47.85 a ni a. Priority Sector hnuaiiah hmalakna leh hlawhtlinna te thlirho a nih bakah Loan pek chhuah dan hrang hrangte thlirho a ni a. Prime Minister Employment Generation Programme (PMEGP), National Rural Livelihoods Mission (NRLM), leh National Urban Livelihoods Mission (NULM) Scheme hnuaiiah hmalakna leh achievement te thlirho a nih bakah Financial year 2024- 2025 Annual Credit Plan (ACP) tlangzarh nghal a ni bawk.

<><><>

INDIA MOURNED IRANIAN PRESIDENT DEAD

Vice President Jagdeep Dhankar chuan vawiin hian Islamic Republic of Iran a tlawh dawn a. A cham chhungin Iran President thi ta Dr. Sayed Ebrahim Raisi, Foreign Minister Dr. Hossein Amir-Abdollahian leh official dang helicopter chesuala thi te vuinaah a tel ang.

President Draupadi Murmu, Prime Minister Narendra Modia leh External Affairs Minister Dr.S. Jaishankar te chuan Dr. Raisi leh Amir Abdollahian te chu an ui thu an lo sawi taw a. Ram hruaitu pahnihten India leh Iran inlaichinnaa an thawhhlawk zia an tarlang a ni.

Iran President thi ta Ebrahim Jaisi thlak tur President thar June ni 28 ah thlan a ni dawn a. IRNA thuchhuah danin Iran interim President Mohammad Mokhber, Judiciary Chief Gholamhossein Mohseni-Ejei leh Parliament Speaker Mohammad baqer Qalibaf te thukhawm chuan inthlan hun hi an ruat a. Iran ram danah chuan President hi ni 50 chhunga thlan tur a ni a. Supreme Leader Ayatollah Ali Khamenei chuan Vice President Mohammad Mokhber chu President lailawk atan a lo ruat hrih a ni.

<><><>

IMD FORCAST

Ramchhung hmarlamah khua a la lum hle dawn niin India Meteorological Department (IMD) chuan a sawi. IMD hrihlawk danin Punjab, Haryana, Chandigarh, Delhi, Uttar Pradesh, Rajasthan leh Madhya Pradesh te chu tun hla ni 25 thleng khawlumin a la tuam dawn a. Hetihlai hian chhimthlang lam atanga lo thawk fur ruahsur chuan Arabian Sea chhimchhak lamte, Maldives, Comorin leh Bay of Bengal chhim lam bakah Andaman and Nicobar Island leh Andaman Sea te ni hnih chhungin a rawn tuam dawn a. Hei vang hian ramchhung chhim lamah chuan Zirtawpni thleng ruah a sur beisei a ni a. Tamil nadu, Puducherry, Karikal, Kerala, Mahe leh Karnataka te chuan ni hnih thum chhungin ruah an dawng dawn nia hriat a ni.

Hetihlai hian ram laili lai leh hmarthlang lamah chuan khawlum zawng hi celsius degree 2-3 velin a san belh dawn niin a hrihlawk bawk a ni.



PAKISTAN HEATWAVE

Pakistan-ah khawlum lutuk avangin zirna in zawng zawng khar a ni a, exam turte sawnhlat niin hospital te chu inralring tura hriattir an ni. Pakistan hmun thenkhatah hian khawlum lai berin celsius degree 50 te a kai dawn nia hrilhlawk a ni a. Tualchhung media te chuan khawlum zawng hi a pangngai aiin degree 8 laiin a sang niin an sawi.

Khawlum hian kar hmasa lawka mi 100 chuangin an thihphahna ruahpui sur leh tuilian a rawn zui a. Sik leh sa dinhmun a inthlak nasa hle a. Tun tum hi kumin chhunga khawlum zawngin celsius degree 50 a pel tum thum na tur a ni a. Mihring leh ranvulhte dinhmun derthawng taka a siam mek a ni.

